



Bentiaraq Ottosen
Atassut

UKA 2024/50
23. oktober 2024

Nunatsinni nerisassiarineqartut pisiniarfinni akiinut suut tunngaviusarnerat pillugu Naalakkersuisut nassuiaasiornissamik peqquneqarnissaannik Inatsisartut aalajangiiffissaattut siunnersuut. Nioqqutissat akitigut pisisartunut pilerinarnerulersinniarlugit qanoq iliortoqarsinnaanera nassuiaammi ilanngullugu tikkuarneqassaaq. Nassuiaat kingusinnerpaamik UKA2025-mi saqqummiunneqarsimassaaq.

(Inatsisartuni Ilaasortaq, Mariane Paviasen, Inuit Ataqtigiit)

Siunertaq kusanartoq torrassinnaasaqaaq, kisianni nunatsinni pissutsit imminut pilersornissatsinnut siunerfeqarnerput ukiorpassuannngortuni eqqartortarparput. Soorlu eqqaaginnarsinnaavara kujataani siunertarineqartoq eqqarsaatigalugu imminut pilersornerulernissatsinnut aqqutissiussiniartoq oqaatigineqartarpoq.

Nunatsinni nammineerluta nerisassiarneqartut pisiniarfinni akigitinneqartut eqqarsaatigalugit aqussinnaanngisatsinnik niuertarfiillu nammineerlutik ingerlataanik akinik aaqquissuuisoqartarpoq, pisortaniillu akuleruffigissagutsigu unammilleqatigiinnermut periarfissaq equsoorussutaasinnaavoq. Niuernerup silarsuaanut pisiniarfilerinerullu silarsuaanut qaammaasaqarnissaq pisariaqarpoq, taamaanniangippat atamanna aatsaat KNI A/S amingartoortoq tusaripput, kinamigoq amigartorneq.

Nioqqutissammi pisiarineqagaarneq ajortut, assersuutigalugu Pilersuisup pisiniarfiani ataatsimi qulittikisinneqarsimappata, marluinnaat tuninerini iluanaarutip qaffasissusaata inississimanerata kinguneranik iluanaarutaareersinaapput, kingornalu quersuup imaajarnerani Outlet-itut immaq 70%-imik akikillillugit sinneruttut tuniniassuaat. Taakkulu sinneqartoorutit iluanaarutaannit nioqqutissat allat ussasaarutigalugit akikillineqarsinnaanissaannuttaaq matussutaasarmata. Taamaattumillu iluanaarutip qaffasissusaata qilaalernerneqarnissaa inatsisiliorneqassappat aarleqqutissat ilagisinnaasaat tassaaleratarsinnaavoq, nioqqutissat ilarpassuisa akitsortariaqarneranik. Annerpaamik akitsoratarsinnaasut tassaapput, piniutaarniarfinni pisiassat akisunerit pisiarineqartarneri akuttunerumaartut, assersuutigalugu annanniutit akiisa apparsarneqarnerisa malitsigisinnaavaat pisiniarfimmi tassani atallaat oqortut, allunaasat, oqummersat, qassutit allarpassuillu akitsortariaqarnissaannik.

Ulluinarnilu pisiassat nalinginnaanerpaat qiviariaraanni, pisiniarfinni ataasikkaat annikitsut akikitsutut taaneqarsinnaasut allat iluanaarutaannik matussuserlugit akikillisarneqartartut piujunnaaratarsinnaapput.

Unammilleqatigiinnerup peqqinnartup nioqqutissat akikinnerusut pilersissinnaavai, assersuutissaqqittoq tassaavoq, ukiualunnguit matuma siorna Ilulissani unammilleqatigiinneq annerusumik piunngikkallarmat naatitanik nunguutsikulaneq nalinginnaalluinnarsimasoq. Taamaattorli Ilulissani Brugseni pilersinneqarneratigut unammillerneq sakkortuumik aallartippoq, Pisiffik Center Marked-ilu annertoqisumik unammillileriataarmata nutaamut ammartumut, malunnaatilissuarmillu illoqarfimmi pisiassat pitsanngoriaateqarmata akitigullu appariaateqarlutik. Eqqumaffigisariallu tullia tassaavoq, uagut nunarsuarmi nioqqutissat akii aqussinnaanngilagut.

Una siunnersuut ataatsimiititaliami susassaqartumi innersuupparput.